

四川一卷六十五

四川一

四川總部

沿革○禹貢梁州之域自古爲蜀國巴國地秦置巴蜀二郡漢武

帝又通西南夷

今叙州府古西南夷之地

平邛笮

今甯遠府境

定冉

今茂州境兼有

氏羌之境置蜀郡巴郡廣漢汶山犍爲越嶲等郡

今龍安府漢爲廣漢郡剛

氏道古氏羌地

屬益州刺史部後漢末昭烈帝建都於此晉爲梁益二

州地南朝多因之梁末入於西魏後屬周隋初置西南道行臺

唐分屬劍南山南及黔中道宋初置西川路又置峽西路尋并

爲川峽路咸平四年分置益梓利夔四路總曰四川路元爲四

川行中書省明爲四川布政使司 本朝因之

形勢○東接兩湖西通衛藏南連雲貴北抵漢興山環水繞險阨之區也○後漢書公孫述傳李熊說述曰蜀地沃野千里土壤

膏腴果寔所出無穀而飽女工之業覆衣天下名材竹幹器械之饒不可勝用又有魚鹽銅銀之利浮水轉漕之便北據漢中杜褒斜之險東守巴郡拒捍關之口地方數千里戰士不下百萬利則出兵而畧地無利則堅守而力農東下漢水以窺秦地南順江流以震荆揚所謂用天因地成功之資○三國志諸葛亮傳益州沃野千里號稱天府高祖因之以成帝業○左思蜀都賦夫蜀都者蓋兆基於上世開國於中古水陸所湊兼六合而交會焉豐蔚所盛茂八區而菴藹焉於前則跨躡犍泮枕輻交趾經途所亘五千餘里於後則却背華容北指崑崙緣以劍閣阻以石門於東則左綿巴中百濮所充外負銅梁於宕渠內面要害於膏腴於西則右挾岷山涌瀆發川陪以白狼夷歌成章至平臨谷爲塞因山爲障峻阻塋塙長城谿險吞若巨防一

人守阨萬夫莫向公孫躍馬而稱帝劉宗下筆而自王由此言

之天下孰尙○南齊書裴叔業傳上疏言成都沃壤四塞爲固

古稱一人守阨萬夫趑趄雍齊亂於漢世譙李冠於晉代成敗

之跡事在前史宜遣帝子之尊撫臨巴蜀○孫承澤曰四川天

下絕險龍川松潘鎮其北播州

今之遵義府也劉屬貴州

諸夷列其南天全

黎州當其西瞿唐巫山守其東江山四塞關峽獨開可以守一

當百○顧祖禹曰四川介在西偏重谿疊嶺深澤大川環繞境

內自相藩籬且逾夔峽東出則據吳楚之上游由利閬北顧則

連褒斜之要道威茂黎雅足控西番馬湖叙瀘以扼南楚自昔

稱險塞焉故張華言蜀漢之土南跨邛笮北阻褒斜西卽硤磈

隔以劍閣窮險極峻

按此係博物志之文今刊本誤作限

宋牟子才有言重慶爲

保蜀之根本嘉定爲鎮西之根本夔門爲蔽吳之根本然而巴

蜀之根本寔在漢中。○按四川阻山環水四塞爲固多爲羣雄所竊據漢末公孫述據之以抗漢晉惠帝以後李氏據此稱成義熙初又歸譙縱梁武陵王紀亦嘗僭號於此唐末之王建五代之孟知祥皆據此稱蜀元末則有明玉珍而明末之張獻忠蹂躪特甚焉然皆不旋踵而亡顧景范曰出棧道而亡蜀者有之矣出江道而亡蜀者有之矣出一道而亡蜀者有之矣出兩道而亡蜀者有之矣司馬錯之於蜀侯鍾會鄧艾之於後主尉遲迥之於蕭紀郭崇韜之於王衍王全斌之於孟昶此以棧道亡蜀者也岑彭吳漢之於公孫述桓溫之於李勢朱齡石之於譙縱湯和之於明昇此以江道亡蜀者也桓溫卒止萬人而疾戰于青衣之間齡石軍分三水而提出於彭模之上符堅使楊安偕諸將叩劍閣而下涪城尉遲迥統偏師越二劍而踰涪水

郭崇韜督諸軍渡桔柏而入鹿頭此以一道亡蜀者也來歛以銳師臨隴道而岑彭以水軍指江關鍾會以重兵攻劍閣而鄧艾以奇兵下陰平王全斌以步騎趨劍門而劉光進以舟師上夔峽湯和將水軍攻瞿塘而傅友德以間道越白水此以分道亡蜀者也然則不攻則已攻則蜀未有不亡者蓋恃險而亡固其所也昔人云在德不在險詎不信哉又按唐中葉以後劍南困於吐蕃韋皋謀之於前李德裕籌之於後闢靈關道建籌邊樓疆事亦孔亟矣吐蕃卽今西藏也今自巴塘以西雖屬衛境然設坐藏大臣以統之寔與內地無殊而大小金川自取滅亡亦復開屯置吏志方輿者皆當旁及之以見我國家跨越千古之盛也○布政司境西連西藏南接雲南界東南接貴州界東接湖南北界北接陝西界西北接甘肅界布政司治成都府

領府十二直隸州八屬州十一縣一百一十在京師西南四千六百七十五里

名山

岷山

在松潘屬西北

○禹貢岷嶓既藝又岷山之陽至於衡山又岷山導

江○史記封禪書自華以西名山七曰瀘山蜀之汶山也

按漢書郊

祀志瀘山蜀之岷山也

○漢書地理志蜀郡蒗氏道岷山在西徼外江水

所出○三國蜀志秦宓曰蜀有汶阜之山江出其腹○華陽國

志岷山一名沃焦山其跗曰羊膊江水所出○水經注岷山在

蜀郡氏道縣大江所出岷山卽瀘山也又謂之汶阜山在徼外

江水所導也○通典松州嘉誠縣有甘松嶺江水所發之源

按松

州卽今松潘屬之嘉誠其州治也然則甘松嶺應羊膊嶺之別名矣

○寰宇記松州平康縣按江

源記云羊膊山下有二神湫乃大江所發之處○太平御覽易

乾鑿度岷山爲井絡家語云江始出岷山其源可泛觴○方輿紀要岷山在茂州西北五百里禹貢岷山導江是也郭璞岷山贊曰岷山之精上絡東井王羲之曰岷山夏含霜雪殆崑崙之伯仲也或謂之鴻蒙卽隴山之南首故曰隴蜀唐十道志劍南道名山曰岷山杜光庭曰岷山連山傍岫千里不絕灌縣青城山乃其第一峯也陸游曰常登岷山欲窮江源而不可越蓋自蜀境之西大山廣谷西南走蠻夷中皆岷也今自岷洮松疊以南其大山峻嶺班班可考皆岷山之隨地易名者耳○禹貢雖指古今言岷山者凡四處一在今四川松潘衛衛東南去布政司七百六十里史記作汶山封禪書云濱山蜀之汶山也漢書地理志岷山在湔氐道西徼外江水所出華陽國志岷山一名沃焦山其附曰羊膊江水所出水經注岷山在蜀郡氐道縣卽

瀆山也隋志汶山在汶山郡左封縣此皆謂在松潘者也一在
 今成都府之茂州本冉廬國漢以其地置汶山郡治汶江縣晉
 改曰廣陽隋又改曰汶山山海經注云岷山在廣陽縣水經注
 云汶水出汶江道徼外岷山玉輪坂下又元和志云汶山縣有
 汶山卽岷山去青城山百里天氣清明望見成都卽隴山之南
 首張栻西岳碑云岷山在茂州列鷲村其附曰羊膊也輿地廣
 記云岷山在汶山縣西北俗謂之鐵豹嶺此皆謂在茂州者也
 一在成都府之灌縣縣本漢綿麗郫江原三縣地周武帝分江
 原置青城縣因山爲名元和志云青城山在蜀州青城縣西北
 三十二里杜光庭成都記云岷山連峯接岫千里不絕灌縣青
 城山乃其第一峯也縣志云汶山在縣北三十里蓋卽青城山
 矣一在今陝西岷州衛本漢隴西郡地西魏置溢樂縣今衛治

卽其故城括地志云岷山在岷州溢樂縣南連綿至蜀幾二千里皆名岷山元和志云山在溢樂縣南一里此皆謂在岷州衛者也然則岷山最大志家各就其所在言之耳大抵岷山北起於溢樂寔跨古雍州之境而南則訖於青城綿地千餘里與太行相伯仲或專指在松潘亦非篤論然大江所出則必直瀕氏道西徼外者也○按方輿勝覽禹貢梁州之山四岷嶓蔡蒙西山皆岷北山皆嶓南山皆蒙也是岷山固不可以方隅限然導江之山必當以漢書爲正東樵之說是也今岷山綿袤於川境西北作障邊圉隔閼羌戎固川西之大阻矣

巫山

通志在夔州府巫山縣東三十里

○戰國策蘇秦說楚王曰西有黔中巫郡

蓋郡據巫山之險因以山名也

○宋玉高唐賦巫山之陽高邱之阻注山南曰

陽土高曰邱漢書注巫山在南郡巫縣阻險也○史記司馬相

如傳緣以大江限以巫山○後漢書公孫述傳荆邯說述曰令
田戎據江陵臨江南之會倚巫山之固注巫山在今夔州巫山
縣東也○水經注江水又東經巫峽杜宇所鑿以通江水也郭
仲產云按地理志巫山在縣西南按此乃應劭說非班志元文也而今縣東有
巫山將郡縣居治無恒故也江水歷峽東經新崩灘其下十餘
里有大巫山非惟三峽所無乃當抗峯岷峨偕嶺衡疑謂九疑山其
翼附羣山並縈青雲更就霄漢辨其優劣耳其間首尾一百六
十里謂之巫峽蓋因山爲名也自三峽七百里中兩岸連山畧
無闕處重岩疊嶂隱天蔽日自非停午夜分不見曦月至於夏
水襄陵沿沂阻絕或王命急宣有時朝發白帝暮到江陵其間
千二百里雖乘奔御風不似疾也春冬之時則素湍綠潭回清
倒景絕巘多生檉柏懸泉瀑布飛漱其間清榮峻茂良多趣味

每至晴初霜旦林寒澗肅常有高猿長嘯屬引淒異空谷傳響
哀轉久絕故漁者歌曰巴東三峽巫峽長猿鳴三聲淚沾裳江
水又東經石門灘○隋書地理志巫山縣有巫山高邱山楚辭所謂巫
峽○通典夔州巫山縣漢爲巫縣有巫山高邱山楚辭所謂巫
山之陽高邱之阻也○太平寰宇記巫山盛宏之荊州記云沿
峽二十里有新崩灘至巫峽因山名也首尾一百六十里舊云
自三峽取蜀數千里恆是一山此蓋好大之言也惟三峽七百
里中兩岸連山畧無缺處自非亭午夜分不見日月所謂高山
尋雲怒湍流水絕非神境○范成大吳船錄下巫山峽三十五
里至神女廟廟前灘尤險惡十二峯俱在北岸前後映帶不能
足其數十二峯各有名俱不甚切○陸游入蜀記神女祠正對
巫山峯巒上入霄漢山脚直挿江中說者謂太華衡廬皆無此

竒然十二峯者不可悉見所見八九峯惟神女峯最爲纖麗巫峽之名蓋因山以名峽也土人以其在蜀東境亦謂之東峽云

○通鑑地理通釋巫峽在巫山縣楚置巫郡荊州記信陵縣西

二十里有巫峽

按信陵在今湖北巴東縣

○名勝志巫峽十二峯曰望霞翠

屏朝雲松巒集仙聚鶴淨壇上昇起雲飛鳳登龍聖泉

按無神女峯或

卽朝雲峯與

○按巫山西接宜陵東連瞿峽爲夔門之外屏寔全蜀

之東戶昔岑彭攻公孫述破荆門長驅入江關劉敬宣之伐蜀亦自峽路進師由黃虎指成都宋乾德二年光義拔巫山等峯以取夔州元末明氏橫江設險廖永忠亦上巫峽破瞿塘以定蜀蓋巫山夾江爲阻由水路入川者不能飛越世徒耳食於高唐神女之說每於娟秀纖麗中求之亦過淺矣唐書地理志山南道名山曰巫峽

峨眉山

在嘉定府峨眉縣東南有三山相連號曰三峽

○華陽國志犍爲郡南安縣南有

峨眉山山去縣八十里○左思蜀都賦帶二江之雙流抗峨眉

之重阻注峨眉山在成都犍爲界面之故曰抗也○水經注江

水東南經南安縣南有峨眉山又青衣水經平鄉謂之平

鄉江益州記曰平鄉江東經峨眉山在南安縣界去成都南千

里秋日清澄望見兩山相對如蛾眉焉○隋書地理志峨眉縣

有峨眉山○唐書地理志羅目縣有峨眉山○元和志綏山縣

峨眉山在縣南六里小峨眉山在縣南六里又羅目縣峨眉山

在縣西四十里又峨眉山縣峨眉山在縣西七里蜀都賦抗峨

眉於重阻兩山相對望之如蛾眉故名此山亦有洞天石室高

七十六里中峨眉山在縣東南二十里有古穴初纔容人行數

里漸寬有鍾乳穴穴有蝙蝠其大如筐

按元和志三縣所載山之方位互有不合蓋峨

眉盤亘廣連應所
在而指名之耳

○寰宇記峨眉縣峨眉山張華博物志以爲

牙門山東峯有石穴深數里出鍾乳常有人持火入穴有蝙蝠

大如箕來撲火穴中有水流冬夏不歇此山之外又有小峨眉

山李膺記峨眉山下有池廣袤十里號龍池又羅目縣小峨嵒

山在縣十里

按通志引此文
作在縣南十里

○范成大峨眉記其畧曰自縣出

西門登山最高峻者曰呼應峯過樟木牛心二嶺至雙溪橋自

是登危磴至白水普賢寺自縣至此皆峻坂四十餘里然始是

峯頂之山脚耳自此至峯頂其高六十里絕無蹊磴斫木作長

梯釘岩壁間緣之而上意天下險峻無踰此者自白水寺登點

心山過茅亭嘴石子殿大小深坑駱駝嶺又過峯門羅漢店大

小扶昇錯喜歡木皮里徧孫梯雷洞坪又過新店八十四盤自

婆羅坪過思佛亭軟草坪洗脚溪至峯頂光相寺初登山衣絺

漸高漸寒至峯頂則摘纒擁爐有泉煮米不成飯俱碎如砂粒

蓋萬古冰霜之汁也○輿地紀勝延福寺有孫思邈故宅青蓮

蓬白雲峽最爲寺中之勝

按寺在呼應峯

又云普賢寺上至光相寺山

徑如線者六十里○方輿勝覽大峨山在峨眉縣西南一百里

有石龕一百十二大洞十二小洞二十八南北有臺中峨山在

縣南二十里一名覆蓬山又名綏山上有葛仙洞小峨山在縣

南三十里一名鐮刀山上有李仙洞與大峨中峨相連是爲三

峨又云峨眉山有日月峯伏羲女媧鬼谷諸洞○名勝志峨眉

崇山之首也名山記峨眉山周市千里石龕百十二大洞十二

小洞二十八南北有臺前代於山初寺六光相居山絕頂爲游

山之底極華岩居山之前峯爲游山之嚮導白水寺居其中自

白水至光相歷八十四盤山徑如線如是者六十里至峯頂○

四川通志舊志云大峨山在縣西南五十里高一百二十里二

峨山在縣南三十里高減大峨之半三峨山在縣西南三十里

又減二峨之半

按綏山自隋志而下無峨眉之名通志亦於三峨外別載綏山惟祝氏以綏山爲中峨是一山

所盤

亘也又舊志由縣南門外登山上解脫坡至華岩寺由寺西出

爲槽木坪爲五十三步有馬鞍山響水橋大峨石下有玉液泉

泉西爲呼應臺又云自白水寺上頂心坡有回龍山南爲大雲

小雲二壑舊名深坑有長老坪鶯殿又殿上九嶺爲蛇倒退猢

猻梯錯喜歡等處又云至光相寺有七寶睹光二臺俗名峯頂

俯視大江如線瓦屋晒經雪山青城厯厯可數○按三峨實一

山也蟠踞大渡河北蜿蜒綿亘西連雅州諸山爲成都南面阻

阨左太冲云抗峨眉之重阻不誣也唐地理志劍南道名山曰

峨眉

禹貢維指蔡蒙旅平史記集解引鄭元曰地理志蔡蒙在漢嘉縣漢嘉卽青衣今按志有蒙山無蔡山而鄭云然蓋